

文

館

詞

林

文館詞林卷第一百六十七

詔三十七

赦宥三

中書令太子賓客監修國史弘文館學士桂國高陽郡開國公臣許敬宗等奉 敕撰

漢宣帝鳳皇集泰山赦詔一首

後漢章帝麟鳳等瑞改元赦詔一首

後魏孝靜帝膏雨大赦詔一首

宋文帝嘉禾秀京師赦詔一首

後周明帝靈烏降大赦詔一首

靈烏等瑞大赦詔一首

又靈烏等瑞大赦詔一首

隋文帝獲寶龜大赦詔一首

貞觀年中獲石瑞曲赦涼州詔一首

漢元帝火災赦詔一首

後漢順帝旱災大赦詔一首

西晉武帝三辰譴見大赦詔一首

西晉惠帝玄象失度大赦詔一首

西晉愍帝地震大赦詔一首

東晉穆帝日月薄蝕大赦詔一首

東晉海西公災眚大赦詔一首

東晉孝武帝地震大赦詔一首

魏震大赦詔一首

大旱恩宥詔一首

陰陽愆度大赦詔一首

立象告譴大赦詔一首

東晉安帝立象告譴大赦詔一首

南齊高帝水旱乖度大赦詔一首

後周宣帝大旱恩降詔一首

陳宣帝辰象僭度大赦詔一首

貞觀年中爲山東雨水大赦詔一首

漢宣帝鳳皇集泰山赦詔一首

制詔迺者鳳皇集泰山陳留甘露降未央宮朕未能彰先帝
休烈協寧百姓承天順地調序四時獲蒙嘉瑞賜茲祉福夙
夜兢兢靡有驕色內省匪懈永惟罔極書不云乎鳳皇來儀
庶尹允諧其赦天下徒賜勤事吏二千石以下爵

後漢章帝麟鳳等瑞改元赦詔一首

制詔朕聞明君之德啟通鴻化緝熙康人光照六幽訖惟人
面靡不率俾仁風翔於海表威靈行乎鬼區然後敬恭明祀
膺五福之慶獲來儀之貺朕以不德受祖宗弘烈乃者鳳皇
仍集麟龍並臻甘露霄降嘉穀滋生芝草之類歲月不絕朕
夙夜祇畏上天無以彰於先功今改元和四年爲章和元年
秋令是月養衰老授几杖行糜粥飲食其賜高年二人共布
帛各一匹以爲醴酪死罪囚犯法在景子赦前而後捕繫者
皆減罪勿咎詣金城戍

後魏孝靜帝雷雨大赦詔

門下朕承天地之休藉祖宗之業以茲寡薄欽受大命君臨

萬國緬踰一紀德之不廣明未能燭實賴將相匡維士庶用
命南傲斂衽北塞承衣海碣謐然關河不警青祇候節則嘉
液從來朱明在律而膏潤應序庶品順性羣物靡違水火菽
粟祥候茲備凡我兆庶鼓腹可期實由神祇眷止精靈是贊
有一於斯載深祇荷願循虛昧當此萬機刑厝未及獄訟不
息虐吏因以輕重朱筆致其淺深肺石磨申鬪士貽怨天下
之廣豈曰無之子育黔首也地當憂責一物非所懼深在予
坐衣望暉非此孰念今宇宙清明風雨和洽草木條暢昆蟲
阜滋爰佇玉燭宜存寬政赦罪開仁務申恩厚可大赦天下
自武定三年五月廿六日昧爽以前謀反大逆已發覺赤手
殺人繫囚見徒流配邊方未達前所者悉原免

宋文帝嘉禾秀京師大赦詔一首

門下朕奉承宗祧嗣守鴻業夙夜寅畏思隆丕緒未能光宣
先德式揚風教惠政弗孚矢言靡訓庶徵誓度邊患屬興念
深納隍每懷明發故躬親帝藉敬蒸務本芟夷不端拯雪萌
癘頃羣方效捷要荒革面時和歲稔禎祥仍集嘉稷玄黍頻
秀京畿合稗祕苑擢穗千畝潔粢神倉薦饗郊廟三才協靈
幽顯偕順永惟休祐何以臻茲自天降康豈伊在予思覃斯
慶施於萬邦可大赦天下文武賜位一等華林園職籌量賜
之

後周明帝靈鳥降大赦詔一首

惟二年八月景子王若曰詒我太師太傅太保太冢宰大司

徒大宗伯大司馬大司寇大司空爰暨列將大夫士州牧守
士公侯伯子男等夫天不愛寶地稱表瑞莫不威鳳巢閣圖
龍躍沼豈直日月珠連風雨玉燭是以鉤命決曰王者至孝
則出元命苞曰人君孝道所感有虞蒸蒸來茲異趾周文翼
翼翔此靈禽文考至德下覃遺仁爰被遠符千載降斯三足
表離曜之明效君道之正將使三方歸本九州龕一惟此大
社繫福在人子安敢讓宗廟之善弗宣大惠可大赦天下文
武官普進二級自今年八月十五日昧爽以前大辟罪以
下厥狀發露未發露其案成洎見徒悉降不問

靈鳥等瑞大赦詔一首

制詔惟夫天工人代樹之元首休徵咎徵必有攸應我皇家

受天明命奄有萬國夙宵震惕勵精不怠登靈臺以觀物坐
總章而布政庶幾六沴不起五福相生祖宗貽厥禎祥頻集
九尾一見三足以來仁獸呈儀慶雲表色至如倉烏赤雀白
兔玄孤嘉禾連理芝草甘露史不絕書充仞天府玉燭斯調
膏雨應節東作歲平西成屢稔重以東國行仁哀矜庶獄朕
大伯母及第四姑楊氏逢茲寬政獄宥來西惟姑已至循心
載展伯母礎暑許尋禮送言而有信所以爲國事本由衷義
無乖爽伯母仁姑屬尊德懿離隔三紀欣奉一朝旣荷天休
又兼家慶思與億兆同此胥悅可大赦天下

又靈烏等瑞大赦詔一首

制詔朕聞受命之君必有神靈之異禎神之符然後得處乎

兆人之上不然曷以永年哉是以方冊所述其事甚眾至如
湯有白狼文有赤雀皆爲表明其道一人視聽我有周誕受
天明於今六祀二薦神鳥之瑞再獻芝草之禎呈九尾於東郊
獲三角於南鄙嘉禾生於舊郊連理出於安定華平茂平禁
液甘露泣乎芳苑其餘祥見殆無虛月朕內省寡薄豈曰能
致當由大祖靈聖幽明無極餘慶可羣狼鍾下武可述先志
屬所庶幾安敢讓茲景福壅天之慶可大赦天下

隋文帝獲寶龜大赦詔一首

李德林

門下昔文出龍鱗軒示於俗字生龜甲堯告羣臣蓋祇奉天
心宣揚神化朕以薄德荷天之休道未潛通常懷愧悚粵以
閏三月癸丑汝州刺史元崇義獻寶龜一其腹下甲文曰天

下揚與隱骨天成文字明顯傍有二所似日月之字此龜出於汝水得自漁人崇義見以爲奇遣使作貢朕傳諸內外俱共徧觀王公卿士咸曰休哉於是尚書奏儀太常擇日喜見圖書之瑞請式壇場之禮往者初膺大寶律應仲春禋祀南郊恐違時令月惟首夏德主於離敢遵肆類之典仍受龜書之賜皇靈明命昭著殷勤拜伏震驚增其慚惕上玄之意唯在愛人自君臨四海憂勞兆庶未能革前王之彫弊變末俗之奸宄禮教尚擁囹圄弗空百姓有過實非其罪是朕訓導不明陷於刑戮何以副蒼昊之德稱黔首之懷責在朕躬無所逃避今燦怒之使當生長之時仰惟天道義存寬宥固將潛運生靈俱登仁壽宜刷蕩瑕穢許其自新可大赦天下

貞觀年中獲石瑞曲赦涼州詔一首

門下昔朱鳥降於周代君臣動色黃龍見於漢室天下稱慶
況乃禎祥顯著靈眷昭然者哉朕嗣守宗祧夙夜夤畏憂勤
在於政道撫育徧於含生十七載於茲矣上玄儲祉貞石表
瑞成命發於文字事高振古冥符適於河洛祚表無疆朕是
以式備禋燎躬謝蒼昊逮於儲兩亦申虔拜玄冬式序黃鍾
在律朔風旣切飛雪載零及長至在辰同雲倏卷旣升泰壇
爰奉玉帛六合開朗愛日揚光兩儀交泰靈旣允集神祇獲
福豈獨在予和樂之慶宜被率土可賜天下大酺三日自漢
魏以來及於近代每有大慶或賜牛酒然牛之爲用耕稼所
資多有宰殺深乖惻愷其男子年七十以上令知縣各量給

酒米麪並以官物充涼州之地嘉瑞攸出加恩之典抑有舊章涼州都督府一州及所管縣大辟罪以下見禁囚徒並宜原放其十惡故殺人劫賊傷人竊傷人謀殺人已傷官人枉法受財監臨主守自盜盜所監臨悉不在施限都督府官人及當州衝府并縣官人並宜賜會以官物充仍令通事舍人一人馳驛往宣詔并看會涼州百姓給復一年金紫光祿大夫行同州刺史檢校都督安康郡開國公李襲譽賜絹一百匹所管縣令賜絹卅匹囚繫之徒雖有罪譴因茲嘉慶彌用哀矜其京城見禁囚徒宜令皇太子諱慮過其諸州囚徒遣使分道馳驛往慮十惡皆不在慮限訖並奏聞仍令所司具爲事條

漢元帝火災赦詔一首

制詔曰迺者火災降於孝武園館朕戰慄恐懼不燿變異咎在朕躬有司又未肯極言朕過以至於斯將何以寤焉百姓仍遭凶阨無以相振加以煩擾乎苛吏拘牽乎微文不得永終性命朕甚閔焉其赦天下

後漢順帝災旱大赦詔一首

制詔朕託王公之上涉道日寡政失厥中陰陽氣隔寇盜放肆庶獄彌繁憂悴永歎疾如疾首詩云君子如祉亂庶遄已三朝之會朔旦立春嘉與海內洗心自新其大赦天下從甲寅赦令已來復秩屬藉三年正月以來還贖其閭顯江京等知識婚姻禁一原除之務崇寬和敬順時令遵典去苛以稱

朕意

西晉武帝三辰謫見大赦詔一首

制詔蓋古之聖王統天御俗咸能仰協陰陽俯和庶類使休徵咸應率土獲安無災眚之患蒙人康之福朕若臨萬邦託於王公之上而德不足以承天惠不足以懷物仁誠未著政刑多失三辰見謫水旱爲災人食不足困於飢饉寇戎不靜征戍勤瘁亡逃竄於林莽繫執幽於囹圄犯罪離辜刑傷者眾何不達之遠朕甚自媿也赦過宥罪易著其象眚災肆赦書載其義此所以蕩瑕滌穢責已崇寬祇慎戒異變復之道也思與百姓日新其化其大赦天下

西晉惠帝玄象失度大赦詔一首

制詔古之明君導人以德齊之以禮人有廉恥之風尚何姦
宄之有故能令行而不犯刑措而不用朕以寡德政化多否
咎徵作見天象失度陰陽謬沴水旱爲災每覽斷獄請奏離
辜者眾大皆繇役勤瘁窮困之由上失其道以陷生靈之命
朕甚自媿也別詔當錄廷尉洛陽以散理寃疑有所寬宥而
今唯加京城不及州郡蒙之者寡懼無以上承天戒下全黎
元其大赦天下自殊死以下皆赦除之庶在位羣賢厲意盡
心日新其後具爲令

西晉愍帝地震大赦詔一首

制詔朕以寡德昧於大道承祖宗之餘慶當廢興之歷運受
命於茲桂棹四載外不能掃蕩元寇奉及梓宮內不能協和

陰陽清穆華夷而近地大震動天將以此警肅朕躬昔鼎耳
之災殷宗修德天地變動素服遷殿今劉載孤寇逆黨乖離
前克大舉席卷平陽然羣庶誑誤深罪者眾宜開弛宥以功
補愆自頃二秦飢荒兵革累年易子折骨道殣相望無賴之
人毀廢漢陽憫茲窮隸重以歎惻又聞平陽蒲坂已東及關
外六夷咸有反善內附之心其大赦天下唯劉載起舟家室
不從赦例

東晉穆帝日月薄蝕大赦詔一首

制詔朕承先緒纂嗣洪基不能弘濟以道惠康黎庶至使眊
俗流弊以陷於釁辟掠楚過訐或有誣濫每聽刑竟所以矜
悼申復至於再三而未能過者求其直也頃日月薄蝕五緯

愆度謹罰旣彰各徵又臻不有失政何以致此雖懷惕厲罔
知其郵賚始厚載乾坤之德肆眚宥罪先王仁澤月正元日
履端革始思與萬國暢此惟新其大赦天下賜鰥寡孤獨不
能自存者人米五斛

東晉海西公災清大赦詔一首

制詔朕以寡德遭家多難纂承洪基屬當大重雖夙夜兢兢
昧且思政而不能陶融玄化宣理二氣致令天文改變太陽
虧曜五緯錯繆於上水旱災害於下外則寇逆未平戎役殷
廣內則勞務未已人力彫弊而文武之司不能勤盡人隱惟
刑之郵罹罪者眾獄訟繁積每覽其事愧悼於懷書云邦之
臧否在予一人思惠元元以康兆庶其大赦天下與物更始

今年三月七日昧爽以前謀反大逆手殺人以下皆赦除之
唯符堅慕暉燁不從赦例庶樂生之類逐陽和以敷育室結
之氣隨谷風以舒散豈敢以上謝天譴蓋所以少慰其心主
者依舊具條制宣下稱朕意焉

東晉孝武帝地震大赦詔一首

制詔夫政道未弘風化未淳求之人事理盡爲遠欲令亥象
昏度五緯順序其可得乎頃者上天垂鑒譴告屢彰朕有懼
然震惕於心思所以存誠致感修近應遠者在於議獄緩死
赦過宥罪庶因天變與人更始其大赦天下謀反大逆手殺
人以下坐慮懷紙罪者悉皆原之冠禮之重告成宗廟前朝
舊典普有位賜蓋酬率土咸同嘉慶其追增文武位各一等

夫刑獄者求盡情當一失其聽則僭濫功臣賢者社稷所由
替而弗嗣則勳美永湮愛敬者自然之性幽而弗顯則至行
靡聞操業者砥礪之階略而弗甄則貞實沈淪今其簡卹刑
獄興廢繼絕有孝於其親忠於其君義婦順孫見重於邦鄉
者又搜揚隱滯務求遺逸一獲之操必令上達其宣下四方
皆以狀聞

東晉孝武帝寔震大赦詔一首

制詔朕以寡德昧於政道承祖宗之重託王公之上雖仰祇
先典傍賴宰輔夕惕晨興思勵遠猷而誠之所感弗能熙暢
天和政之所弘未足允洽時雍嘉祥愆應咎徵仍至重以天
威霆震告肯觀異祇違式懼有同冰谷可以不仰惟靈譴克

已思復鑒於休否弘其攸濟夫祈天存乎順人郵災莫若修德陷於罪蓋司契之責怨譴彌興實屢擾之由宜其明郵政刑求人之瘼乃身存誠惠拯危塗戾其大赦天下自謀反大逆手殺人以下在今年六月十九日昧爽以前皆赦除之比歲荒儉百姓多弊其自泰元二年以前所餘逋租宿責備賦儻耗壹皆蠲除鰥寡獨孤老六疾不能自存者人郵米五斛寇逆未彌疆場多虞經略遠防非眾莫濟哀此戍役勞怨未已豈忘寧息方事維殷其戛口戍人年既周各復其本不得以一時充役遂染以軍名主者明承此詔以爲永制又多

有死亡存沒可憫其下所在各賜其家米十斛人遇疫厲死者家給布二疋於戲百辟羣司並悉心力嘉謀忠告以匡不

速政有不便於人者隨事以聞懋弼諧予一人以懷保於兆庶夫登賢進善有國基趾簡靜仁惠爲政所先斯道旣弘誠心是暢庶乎桑穀降殷旱雲興周

東晉孝武帝大旱恩宥詔一首

制詔頃立象失度大旱成災由朕之不德昧於政道雖復夕惕若厲坐以待旦微咎思復罔知攸濟自非寬刑省賦惠安百姓無以仰謝天譴俯塞人責便籌量賑給孤老明察庶獄且可考計郡縣戶戶叛散之數一年內死亡多少有傷化害政不便於人者各隨局極言得失朕將虛心聽焉往以強寇縱逸權取臧吏蓋當時之宜非經國之制或因犯事遂譴充阜隸雖羣小多愆亦由役使無方陷之刑辟良用慙然其過

衛葬一皆散遣縱年限未滿悉還屬所隨才敘用勿拘往制
東晉孝武帝陰陽愆度大赦詔一首

制詔強寇剋殄而經略惟始事役之勤未及一息加比年不
登道殣相望物不獲豫則輕陷刑辟頃玄象告變水旱不調
天人同符有若影響豈將教違冥復之本化乖覃及之德哀
矜未著於此故令陰陽愆度於彼邪惟茲在予永言增歎思
令黎元與之更始羣戒革面開其自新洗誠宥罪庶答天譴
其大赦天下

東晉孝武帝玄象告譴大赦詔一首

制詔上德不言而玄化自運豈時有隆夷將弘之由人邪朕
承天位思齊厥旨庶存誠冥復理順漸至而風教彌陵頌聲

弗聞玄象違行告譴不已頃雖洗心剋己曾無微應動之失
理其實在予而歸咎百姓陷以刑罰非所以宥元元之命對
上天之意也今元會大享率土同歡和德始布含生樂遂因
感兼懷思令兆庶其大赦天下十年以前逋租宿責悉蠲除
之

東晉安帝玄象告譴大赦詔一首

制詔夫霜露易節歲功遂其序德刑代揮哲王凝其宰斯顯
仁之至用成務之通軌自道謝玄風靡不由之者也朕以寡
德弗克負荷洪統靈基中墜泉谷幸賴命時再建皇極每鑒
寐永念三復厥難思弘振王道以康惟新之祐而理乖昧始
其差或遠虛誠未著災眚已彰頃玄象屢譴於上亢旱每愆

於時凶愚之狡猶或妄作豈餘圯之未澄將在予之實臻邪
仰懷俯慨良增惟疚其大赦天下與之更始謀反大逆手殺
在今年三月十九日以前皆赦除之逋租宿負應所除者詳
爲條制往以年穀荒儉故禁酒以紓其弊既去稔告登百姓
粗給宣導情禮亦不宜久擁可還通之

南齊高帝水旱乖度大赦詔一首

王儉

門下朕君臨區寓於今三載雖夙宵夙戒弗遑荒怠而陰陽
未調水旱乖度倉廩既闕風教多違圉圖實繁政刑靡緝萬
方之過在予一人思弘優澤曷茲更始可大赦天下逋租宿
責祥所原除

後周宣帝大旱恩降詔一首

制詔朕以寡薄昧於政方不能使天地休和陰陽調序白春涉夏甘澤未豐既軫西郊之難將虧南畝之業興言夕惕無忘鑒寐良由德化未敷政刑多舛萬方有罪責在朕躬思覃寬惠被之率土見罔死罪並降從流流罪徒五歲刑以下悉皆原宥其反叛惡逆不道及常赦所不免者不在降例

陳宣帝辰象愆度大赦詔一首

門下畫冠弗犯革此澆風孥戮是陷化於薄俗朕肅膺寶命迄將一紀思經邦濟俗憂國愛人曰疋劬勞夜分輟寢而還薄反朴其道靡階雍熙盛美莫云能致遂乃鞠訊之牒盈於聽覽春欽之人煩於牢犴周成刑措漢文斷獄杼柚空勞選焉既遠加以叢爾醜徒軼我彭汴淮汝萌庶企踵王略肅兵

誓旅義存拯救飛芻挽粟征賦頗煩暑雨祁寒寧忘咨怨兼
宿度乖舛次舍違方若曰之誠責歸元首愧心斯積馭朽非
懼卽建子今月微陽初動應此嘉辰宜播寬澤可大赦天下
貞觀年中爲山東雨水大赦詔一首

門下天地播氣垂生育之德皇王御厯弘覆燾之仁故能以
成萬類光宅八表朕祇奉茲訓嗣守鴻業承百王之季木屬
四海之彫殘晨興夕惕毋忘兆庶尅已勤躬思隆政道欲使
陰陽順序干戈載戢庶幾前烈致茲刑措而山東之地頻年
不稔水雨爲災飢饉相屬蠢爾西戎屢擾邊境事不獲已遂
勞兵車良由誠未動天德不被物興言念此撫已多慙加以
澆僞尙繁刑典仍用雖復留心聽斷明懷庶獄常恐縲紲之

中含冤靡訴□□所及弗辜致罪一物有恐責深在余今歲
惟暮春時屬生長宜順天布澤與物更新可大赦天下自貞
觀九年三月十六日昧爽以前大辟罪以下已發覺未發覺
已結正未結正繫囚見徙罪無輕重皆赦除之其常赦所不
免十惡妖言惑眾語及國家情理切害劫賊傷人故殺人謀
□□□□叛已上道及降死從流并流配上道者並不在赦
例

文館詞林卷第六百六十七

文館詞林卷第六百六十八

詔令

中書令李寶靈監修國史改文館王上柱國高陽郡開國公臣許敬宗等奉 敕撰

漢哀帝改元大赦詔一首

魏文帝改元大赦詔一首

西晉武帝卽位改元大赦詔一首

改元大赦詔一首

東晉元帝卽位改元大赦詔一首

改元大赦詔一首

東晉簡文帝卽位大赦詔一首

下闕

後魏孝文帝改元大赦詔一首

宋武帝卽位改元大赦詔一首

宋孝武帝改元大赦詔一首

南齊高帝卽位改元大赦詔一首

南齊廢帝改元大赦詔一首

南齊海陵王卽位改元大赦詔一首

南齊明帝卽位改元大赦詔一首

改元大赦詔一首

南齊東昏侯改元大赦詔一首

梁武帝卽位改元大赦詔一首

改元大赦詔二首

北齊廢帝卽位改元大赦詔一首

北齊孝昭帝卽位改元大赦詔一首

北齊武成帝卽位改元大赦詔一首

後周明帝卽位改元大赦詔一首

陳武帝卽位改元大赦詔一首

陳宣帝改元大赦詔一首

隋文帝登祚改元大赦詔一首

改元大赦詔一首

隋煬帝卽位改元大赦詔一首

漢哀帝改元大赦詔一首

制詔漢興二百載歷數開元皇天降非才之佑漢國再獲受命之符朕之符朕之不德曷敢不通夫基事之元命必與天下自新其大赦天下以建平二年爲太初元將元年

魏文帝改元大赦詔一首

制詔昔三祖神武聖德應天受祚齊王嗣位肆行非度轉覆厥德皇太后深惟社稷之重延納宰輔之謀用替厥位集大命于一人以眇眇之身託于王公之上夙夜祇畏懼不能嗣守祖宗之大訓恢中興之弘業戰戰兢兢如臨于谷今羣公卿士股肱之輔四方征鎮宣力之佐皆積德累功忠懃帝室庶憑先祖父有德之臣左右小子用保乂皇家俾朕蒙闇垂拱而化蓋聞人君之道德厚侔天地潤澤施四海先之以慈愛示之以好惡然後教化行於上兆庶聽於下朕雖不德味于大道思與宇內共臻茲路書不云乎安人則惠黎人懷之其大赦改年減乘輿服御後宮用度及罷尙方御府百工伎

巧靡麗無益之物

西晉武帝卽位改元大赦詔一首

張華

制詔御史中丞等昔朕皇祖宣王聖哲欽明獲應期運熙帝
之載肇啟洪基伯考景王執道宣猷緝熙諸夏至于皇考文
主濬哲光遠允協靈祇應天順人受茲明命仁濟于宇宙功
格于天地肆魏氏弘鑒于古訓儀刑于唐虞疇咨羣后爰輯
大命於朕身子一人畏天之命用弗敢違遂登壇于南郊受
終于文祖燔柴班瑞告類上帝惟朕寡德負荷洪烈允執其
中託于王公之上以臨君四海惴惴惟懼罔知所濟惟爾股
肱爪牙之佐文武不貳心之臣乃祖乃父實左右我先王以
彌寧帝室光隆大業思與萬國共饗休祚其大赦天下與之

更始自謀反大逆不道已下在今年十二月七日昧爽以前
皆赦除之改咸熙二年爲泰始元年賜人爵五級露布天下
及諸王公國別使稱朕意焉

西晉武帝改元大赦詔一首

制詔蓋至化之本寬以居之仁以行之然後道濟天下品物
得所朕以不德託於王公之上在位十年不能光宣大訓嘉
靜內國吳會僭虐戎夷作害成者勤瘁於外百姓劬勞於內
加以水旱爲災歲比不登雖昧且兢兢不遑荒怠未能道德
齊禮使羣生獲益斷獄歲增人免無恥上古易簡而化成刑
輕而姦改仰觀在昔而今者不逮之遠哉書不云乎邦之不
臧惟予一人有逸罰意者豈文教未篤政煩網密故醇樸離

散以至於此歟思存化本務與四海共興時雍使元之人咸
得自新其大赦天下改元爲咸寧

東晉元帝卽位改元大赦詔一首

制詔昔我高祖宣皇帝至德應期受天明命立石著瑞肇基
帝道景皇纂戎文皇扇烈重離宣曜庸蜀稽服武皇受終登
陟帝位光澤天下九州順軌惠懷多難帝主不造夷狄豺狼
肆其暴亂京都傾覆宗廟爲墟孤悼心失圖靡知所措繕甲
修兵補結天網將以雪皇家之恥蕩鯨鯢之害然後謝賁象
魏歸身藩臣生死之志畢矣今百辟卿士億兆之人上陳靈
符下稱物情同見翼戴若影響焉孤誓心不迴至于三至于
四有司固請所守有辭志不可奪孤逼于羣吏之議用奉上

蒸嘗虔祀祖考明告靈神以祇休命今立宗廟備百僚所以
奉先帝傳晉祚總九牧保生靈也惟爾股肱爪牙之佐文武
不貳心之臣其各立功立事以扶我帝室其與天下蕩滌瑕
釁改往自新同率子來致天之罰其大赦天下改建興五年
爲建武元年

東晉元帝改元大赦詔一首

制詔昔我高祖宣皇帝誕應期運廓開皇基景皇帝文皇帝
奕葉重光緝熙諸夏爰暨武皇帝應天順時受茲明命功格
天地仁濟宇宙昇平刑措卅餘載矣昊天不融降此鞠凶懷
帝短折越去王都天禍薦臻大行皇帝崩徂社稷無奉六合
無主肆羣后三司六事之人弘鑒古訓刑于興廢疇咨庶尹

至于華戎致輯大命于朕躬余一人畏天之威用弗敢違遂
登壇南岳受終文祖焚柴頌瑞告類上帝惟朕寡德纘戎洪
緒君臨四海惴惴憂懼若涉川冰罔知攸濟惟爾股肱爪牙
之佐文武熊羆不貳心之臣用能宣力四方左右我先帝彌
寧晉室輔余一人思與萬國共同休慶其大赦天下改建武
二年爲太興元年

東晉簡文帝卽位大赦詔一首

制詔昔王室多故穆哀早崩皇胤夙零神器無寄東海王以
母弟近屬入纂大統嗣位累年昏闇亂常人倫虧喪大禍必
及則我祖宗之靈靡知所託皇太后深懼皇基時定大計大
司馬因順天人協同神略親率羣后恭承明命雲霧旣除皇

極載情乃願朕躬仰承洪緒雖伊尹之寧殷朝博陸之安漢
室弘道委任齊契古賢朕以寡德猥居元首司牧羣黎奉主
社稷永惟先帝受命中興光隆盛業竇懼眇然弗克負荷戰
戰兢兢罔知攸濟思與兆庶革心更始其大赦天下大酺五
日增文武位二等
以下闕

文館詞林卷第六百六十九

詔三十九

赦宥五

中書令李賓嘗監脩國史弘文館學士柱國高陽郡開國公
臣許敬宗等奉 敕撰

東晉安帝平桓立改元大赦詔一首

平洛陽大赦詔一首

平姚泓大赦詔一首

平賊大赦詔一首

後周靜帝平尉迴大赦詔一首

隋文帝平陳大赦詔一首

隋煬帝平遼東大赦詔一首

武德年中平蒲州城曲赦河東吏人詔一首

平王充竇建德大赦詔一首

平竇建德曲赦山東詔一首

平輔公祏及新定律令大赦詔一首

平北狄大赦詔一首

貞觀年中平高昌曲赦高昌部內詔一首

東晉穆帝誅路永等大赦詔一首

東晉安帝誅司馬元顯大赦詔一首

後魏孝莊帝殺爾朱榮元天穆等大赦詔一首

宋文帝誅徐羨之傅亮謝晦大赦詔一首

宋順帝誅崔慧景大赦詔一首

南齊東昏侯誅始安王遙光大赦詔一首

後周武帝誅宇文護大赦詔一首

東晉安帝平桓立改元大赦詔一首

制詔朕以寡德夙纂洪緒不能緝熙遐邇式遏奸宄自隆安
告肇多難薦降賊臣桓立乘釁肆亂禍傾宗傳毒加良正遂
乃誣罔天人纂據極位朕躬播越淪胥荒裔宣皇之基眇焉
已墜九服之內豈復晉有賴鎮軍將軍裕忠武英斷誠冠終
古運謀僉始貞賢協其契收涕誓眾義士感其心故霜戈一
揮巨猾迸跡舊都肅清園寢崇復三帥凌威所在席卷大憝
授首計日旋軫而孽振猖狂嗣凶荆郢危逼之慮有過履武
天祚社稷義旗載捷狡徒沮潰朕獲反正斯實宗廟之靈勤
王之勳豈朕一人獨享伊祐思與億兆聿茲更始今大赦天
下謀反大逆手煞人以下及長徒皆赦除之桓立桓振一祖

之後有擁兵拒逆者馮該卞範之父子何澹之溫楷不在原
例改元興四年爲義熙元年賜人爵二級鰥寡孤獨不能自
存者穀五斛大酺五日

東晉安帝平洛陽大赦詔一首

制詔自中原翦覆十紀迄今舊京爲墟園陵幽辱二帝梓宮
永淪非所此祖宗所以顧懷遺恨前賢所以沒齒貽恥今命
時翼運圯終有期王師薄伐振耀威靈將灑滌函夏掃清五
陵拂穢平陽奉遷園兆雪人神之積恥紆遺黎於倒懸率土
咸慶含氣鳧藻思俾洪澤普被區宇加頃師旅殷費役賦未
簡軍令峻重刑獄繁積軍人勤曠宜有霑慰其大赦天下

東晉安帝平姚泓大赦詔一首

制詔昔陽九告災永嘉失馭四夷交侵諸夏瓜分幽五陵於
寇域淪二塋於平陽諒以難棘於戲水禍深於驪山者矣思
靈命東迴光宅衡霍雖規模宏遠而日不暇給遂令封豕
華長蛇橫噬祖宗旰食家牧晏寢莫能極匪人於五原暨
教於南朔上天有載未亡九服誕授聖宰靈武命代八紘未
張思大援於中畿昧弱有徵撫時來於介石故能咸揚未揮
則伊洛澄流總于九河則威震龍漠遂乃戎輅西轅彤弧遠
指解網倒戈之徒長驅奔北之虜崩僞帥於崑潼羈大憝於
關右百稔逋誅剋黜於崇朝十紀左帶迴衽於一晨約其三
章弛其密網風雷戢威雲澤光被煥禮樂於九圍融皇風於
四表執訊獲醜反旆告成人兼山東之悅師無遂葆之勤

文館
黎逢太平之基海內承卻馬之業豈伊有晉未臻茲慶越在
上代孰疇斯祐匪予一人獨膺厥祚俾宗廟四海實兼伊履
今歸正之華革面之裔及萬國億兆咸覃嘉祉播惟新於率
土灑皇澤於無外豈不休哉豈不盛哉其大赦天下

東晉安帝平賊大赦詔一首

制詔蓋玄古結繩而人無邪唐虞象刑而頌聲作仰瞻在昔
何不逮之遠意者將邦之不臧上失其道歟朕以眇身夙承
多福纘戎洪緒託于兆人之上實以不德叢脞于位思其攸
濟若履深薄今奸宄雙斃內外清肅華畿振四維之綱荆吳
絕梟鷂之饗豈朕一人獨受其賜俾宗廟四海實兼斯祐思
與九服式同茲慶惠康中國以綏四方其大赦天下

後周靜帝平尉迥大赦詔一首

隋李德林

制詔朕祇承洪業二載於茲藉祖考之休憑宰輔之力經天
緯地四海晏如逆賊尉迥才質凡庸志懷奸慝因緣戚屬位
冠朝倫屬上天降禍先朝晏駕萬國深鼎湖之痛四海窮邊
密之悲獨幸天災欣然放命稱兵擁眾使懷問鼎乃詔六師
肅茲九伐而凶徒孔熾充原蔽野諸將肆雷霆之威壯士縱
貔貅之力芟夷縈拂所在如莽直指漳濱擒斬元惡羣醜喪
魄咸集鼓下順高秋之氣就上天之誅兩河妖孽一朝清蕩
自朝及野喜并相趨昔上皇之時不言而化聖人宰物有教
而已未戢干戈實深慙德思弘寬簡之政用副億兆之心可
大赦天下

隋文帝平陳大赦詔一首

李德林

門下朕祗膺寶圖君臨宇內率土之眾憂責在己自漢氏數窮三方爲敵晉朝傾覆四海多虞諸夏帝王干戈未戢江表僭擅久竊湖海不賓上國將三百年陳叔寶因藉僞基昏狂縱毒下人塗炭控告於我故命將出師救彼危厄賴蒼昊降福宗廟神靈將軍運百勝之謀戰士出萬死之志張天羅以分路歷地險其如飛陸戰水攻往若摧朽幕府自當建業摩軍誓眾號令始行候騎數千已卽平定僭名私署銜璧頓顛黜一凶主誅五邪臣刑之所及六人而已順明靈而伐罪爲生人而報讐役不淹時兵有全國二旬之內廓清萬里分令新邦徧揚朝化先王文軌之域昔日冠帶之區荷仁義之舉

承寬大之詔仰拜天休喜出湯火死而更生未足爲喻幽遐
荒忽無不內款往者每顧東南獨違聲教一隅不遂深切懷
抱妖氛清蕩實慰朕懷率土欣然咸同斯慶心隨兆庶政逮
四時言念猶夏之前事殊大定之後方持德化漸代刑書因
太平之始開自新之路可大赦天下自開皇九年四月十八
日昧爽已前大辟罪已下已發露未發露繫囚見徒悉皆原
免

隋煬帝平遼東大赦詔一首

門下天地施化生育之德既弘皇王建極載濟之功斯大故
能經綸四海撫育萬方朕嗣膺靈命屬當負荷思隆景業克
播鴻猷晷緯不露之鄉咸被聲教梯航所絕之域罔弗來庭

而遼左曷夷獨懷逆命惡甚夙沙罪浮獯獫朕奉遵先志躬行弔伐爰整六師親率三令上憑宗廟之靈實賴幽明之德歷代逋醜一鼓大定懾彼遐裔萬里肅清今凱樂云旋長羸布氣宜順茲舍養與物惟新可大赦天下自大業八年四月十六日昧爽以前大辟罪以下已發覺未發覺已結正未結正繫囚見徒罪無輕重皆赦除之其常赦所不免謀反大逆妖言惑眾語及國家者並不在此例其諸郡供軍事者並給復一年其所役丁夫匠至涿郡者給復二年至臨榆關以西者復三年至柳城郡以西者復四年至瀘河懷遠以西者復五年至通定鎮以西者復七年至渡遼西鎮者復十年流配未達前所亦宜免放除名解官並聽收敘其鰥寡孤獨不能

自存者量加振贍高年之老賜以束帛并賜天下大酺五日
女子百戶牛酒孝悌力田義夫節婦並宜隆異表其門閭遼
左之毗新霑皇化宜遣使人刑部尚書正議大夫衛文昇守
尚書右丞劉士龍等巡撫存問仍給復十年卽置郡縣以相
統攝若有奇能異等隨才任用同之齊人無隔夷夏挾藏軍
器亡命山澤百日不首復罪如初敢以赦前事相告言者以
其罪罪之

武德年中平蒲州城曲赦河東吏人詔一首

門下朕躬率義旅靜亂寧人粵自太原至于京邑伐叛柔服
遠至邇安而河東一城久懷逆命闔門拒守彌歷歲年賊帥
任善恭王行本等誑誤良善拘逼細人假署官僚擅行煞戮

遂乃東招建德北附武周結託凶徒虛相影會志圖叛換害
虐生靈計盡力窮糧殫援絕逃竄無所始伏其辜國有常憲
理從大戮念茲黔首久迫凶威自拔無由事不獲已同陷羅
網有懷矜悼刑之所及唯在渠魁脅從之徒一皆原宥並宜
安撫各使復業

武德年中平王充竇建德大赦詔一首

門下天生烝人樹之司牧光宅區宇撫字黔黎日月照臨文
明於於是統極雷雨作解順時所以布化往者隋季道衰
政刑廢缺九服雲擾五岳塵飛率土之叱墜於塗炭瞻天踏
地控告無所朕愍彼橫流志存拯溺投袂鞠旅肇建義旗伐
暴除殘克寧宇縣靈祇叶贊遐邇樂推歸運所集祇膺寶位

戡翦多難綏輯遺萌溥彼萬方情均覆育然而王充放命擾
亂周韓建德遊魂虔劉趙魏害虐良善阻絕朝風言念匪人
久罹凶毒滿堂之樂猶有向隅納隍之歎無忌分夕是以出
車命將伐罪弔人宗廟威靈卿士效節旌旂所拂醜徒冰泮
二凶授首萬里廓清書軌大同氛祲澄蕩亭候解析烽燧無
虞振旅休兵塗歌里抃今旣九圍靜謐八表乂安思與吏人
厲精更始又惟寡德政道多違陰陽不調致茲亢旱深思□
□惕懼震懷解網崇恩宜流凱澤可大赦天下自武德四年
七月十二日昧爽以前大辟罪以下已發露未發露繫囚見
徒悉從原放唯子煞父母孫煞祖父母妻妾煞夫奴客女部
曲煞其主及免死配流之人不在赦例自餘流徙邊方未達前

所及常赦所不免者皆赦除之改行刷恥義在自新棄瑕錄
用睿哲通典自武德二年十二月卅日以前亡官失爵者量
聽敘用喪亂以來人多失業寧壹之後方定厥居宜有優裕
蠲其事役天下萌庶並宜給復一年其陝鼎虢函虞芮六州
供東行兵馬運糧者轉輸之費勞弊實深又幽州總管內諸
州久隔寇戎誠節表著並宜給復二年其運糧經十迴以上
者給復三年若先已得復年限未滿者計未滿年通數准給
其六州官人專當轉運者皆進二品處分諸逋懸租賦事在
武德三年十二月卅日以前者並宜放免勿更徵收流寓他
鄉見無戶籍者任其情樂所在附貫其有被略及自賣爲奴
婢者改正爲氓戎校之士劬勞征役勳賞雖願宜加褒異其

義士身有大將軍以上官者並令出軍隨其所能量材處分
義寧二年左右元帥所留兵士於陝州以東鎮守不離部校
者並免二年軍役自武德元年以來從秦王諱軍行征討諸
處逆賊經再度以上從戎者皆免一年軍役身死王事未經
論敘者量加褒贈子孫承襲其應受賞賜無親屬者爲營福
業用資冥助頃因離亂爭奪相仍鋒刃所加死亡非一暴骸
中野比來收瘞掩骼埋齒義存茲日州縣祭饗以時殯葬戰
場之處爲起佛塔藉此勝因以脩善本諸軍義士及州縣募
人羸者疾病及小弱者簡驗知實聽出團伍往者方隅未靜
軍吏獻功從惡之徒入于罪隸旣已懲又宜從洗滌其蒲州
城戶及前所獲東都俘囚配充戶者並放爲人貨弊之設交

易有無因時適變貴得其所五銖之錢年代已積既漸訛濫
質賤價輕不便於人今宜停斷新鑄造者可卽頒用刑辟之
書期於整俗政象之法損益不同末代澆浮條章弛紊革命
創制方垂憲則律令格式卽宜修定未頒之前且用開皇舊
法孝子順孫義夫節婦所在詳列旌表門閭奇材異行隨狀
薦舉高年癯獨量加恤贍亡命山澤挾藏軍器百日不首復
罪如初敢以赦前事相告言者以其罪罪之

武德年中平竇建德曲赦山東詔一首

門下自有隋失馭政散人流盜賊交侵區宇離析喋喋黔首
俱被焚溺之災元元無辜並困豺狼之吻朕受天明命君臨
八極尅除暴亂大拯萌黎聲教所覃無思不服唯彼趙魏尙

隔朝風竇建德往因喪亂聚結徒黨竊據州邑擅置僚司叛
換一隅恣行凶虐朕愍彼河朔久遭塗炭納隍軫慮無忘興
寢但以凋弊之後惡煩士眾且事含弘未先討擊然而遊魂
放命數稔貫盈驅率犬羊圖爲侵斥與王充賊黨潛通約結
欲相救援輒來舉斧以抗大軍兵威所臨醜徒崩潰生擒建
德囚致軍門凡厥枝黨皆就虜獲歷稔逋寇一與廓清蕩滌
遺黎與之更始可赦山東諸州舊爲建德所誑誤者自武德
四年五月八日以前皆除其罪仍令太子左庶子柱國滎陽
郡開國公鄭善果爲山東道慰撫大使存問萌俗宣布朝章
其有率眾全城因機立效者量其功績隨卽補用高才獨行
並宜超擢其罪狀有不可原者使人量簡處分鰥寡孤嫠厚

文館
九
加贍恤所須分割州縣補置官僚亦委善果量事斷決具錄
奏聞其有亡命山澤連羣結黨詔書到後卅日不來歸首復
罪如初

武德年中平輔公祐及新定律令大赦詔一首

門下自有隋失馭盜賊交侵四海羣飛六合雲擾上天降鑒
爰命朕躬戡定凶災廓清宇縣然而江湖之外水鄉僻遠向
化之人未能自遠逆賊輔公祐驅扇凶醜蟻聚蜂屯侵虐黎
萌搖動城邑朕愍茲塗炭義存弔撫令彼偏師聊申薄伐沿
流而下應機克定氛祲清蕩遐邇乂安文軌大同朝野咸慶
今朱明戒序時方長育宜順天心播茲仁惠又律令初定始
命頒行惟新之典義存洗滌可大赦天下自武德七年四月

一日昧爽以前大辟罪以下已發露未發露繫囚見徒悉從原免其十惡劫賊官人枉法受賕主守自盜及常赦所不免并流配已上道者並不在赦例亡命山澤挾藏軍器百日不首復罪如初其江州道行軍經塗悠遠非無勞倦供運轉輸及從軍者並宜給復二年從軍之內有犯罪除解官人立勦效者並復官爵仍依本品隨材處分揚越之人厭亂日久新霑大化宜加凱澤其東南道行臺管內諸州大辟罪以下已發露未發露並宜赦免見在戶口並給復一年其與賊黨同心共爲逆亂非被迫脅情狀難原者不在赦例

武德年中平北狄大赦詔一首

門下天生烝人樹之司牧莫不仰膺靈命克嗣寶圖用能永

享鴻名常爲稱首朕君臨八表于今四載夙興夜寐無忘晷刻履薄馭朽思濟黔黎推此至誠庶幾王道上荷蒼旻之睠下藉股肱之力宇內休平遐邇寧泰率此區域致之仁壽懼彼葷戎爲患自昔軒昊以來常懼寇暴是以隆周致涇水之師強漢受白登之辱武夫盡力於關塞謀士極慮於廟堂征伐和親無聞上策有隋交亂憑凌滋甚疆場之毗曾無寧歲朕韜戈鑄戟務存遵養自去歲迄今降款相繼不勞衛霍之將無待賈勗之略單于稽首交臂葉街名王面縛歸身夷邦襁負而至前後不絕被髮左衽之鄉狼望龍堆之境蕭條萬里無復王庭唯頡利挺身逃竄林穴天網雲布走伏何所大同之期諒在茲日斯皆上玄降祐清廟威靈豈朕虛薄所能

致此方欲至仁化物宜存寬惠思與萬邦同享斯福可大赦
天下自貞觀四年二月十八日味爽以前罪無輕重大辟
以下已發覺未發覺已結正未結正繫囚見徒皆赦除之流
配未達前所宜悉放還

貞觀年中平高昌曲赦高昌部內詔一首

門下雲行雨施天道所以平分赦過宥罪帝德所以廣運故
能亭育萬物飛沈之性不天戡濟八方遐邇之心咸遂朕嗣
膺景命負荷鴻業思致隆平同符至化鯤海龍堆之外遠脩
貢職炎洲寒澤之表俱襲冠帶蠢爾高昌獨懷逆節奉上之
禮頓闕恤下之道盡廢虐其萌庶吞噬甚於豺狼遏絕行旅
放數極於蕪瀚禍盈有苗釁踰商奄朕情深弔伐爰命出師

蒼昊降靈宗廟介福流沙之地芻牧有餘磧鹵之間水泉涌
出長驅荒裔直指賊庭傾頓天網俯橫地絡將帥運必勝之
略義勇勵推鋒之志屠堅城於崇朝彌道誅於萬里軍無瘡
痍之弊士息疾苦之憂威振崑閩澤浸濛汜華夷胥悅朝野
同慶且彼之黎元出自中土淪陷異域亟歷年代雖其君負
罪而百姓何辜旣革戎狄之俗方漸禮讓之化宣布仁惠與
之更新可曲赦高昌部內貞觀十四年九月九日以前大辟
罪以下事無輕重皆赦除之

東晉穆帝誅路永等大赦詔一首

制詔朕以寡德攝當天位夙夜矜惕憂心若厲不能靜壹羣
情厭塞姦孽至令路永背叛于瓚縱害戴義等敢肆凶慝雖

伏辜戮豈不憺怛且桀寇未殄刑理未簡■囹圄引驗懼有枉濫思與兆庶同其寬政其大赦天下以永和二年三月一

一 一 咏爽以前自殊死以下皆赦除之

東晉安帝誅司馬元顯大赦詔一首

制詔夫運有休否人功代其成時有屯泰靜亂之所由元顯專寵肆凶罔顧天人毒虐被於四海悖逆彰於家國名教之道既淪三才之用盡矣遂竊矯號令以肆上官之謀無君之心將徙社稷之基朕虛疾于心莫知攸濟使持節侍中中外都督丞相錄尚書事揚州牧荊州刺史南郡公立匪躬其誠乘機電赴元惡霧消皇猷載穆迴已危之基開永泰之運功格天區德陶生人微禹之歎復存於今思與億兆同斯大慶

其大赦天下一依舊典庾楷司馬尚之高素雅之父子及丞相府所收奸黨不在此例

後魏孝莊帝殺爾朱榮元天穆等大赦詔一首 溫子昇

門下蓋天道忌盈人倫疾惡疏而不漏刑之無捨是以呂霍之門禍譴所伏梁董之家咎徵斯在頃孝昌之末天步艱危女主亂政監國無主爾朱榮爰自晉陽同憂王室義旗之建大會盟津與時樂推共成洪業論其本圖非無勞効但致遠恐泥終之實難會未崇朝豺聲已露河陰之役安忍無親王公卿士一朝塗地宗戚靡遺內外俱盡假弄天威殆危神器時事倉卒未遑問罪尋以葛賊橫行馬首南向捨過責成用平醜虜及元顥問鼎大駕北巡復致勤王展力行所以此論

功且可補過既位極宰衡地踰齊魯容養之至豈復是過但
心如猛火山林無以供其暴意等漏卮江河無以充其溢既
見金革稍寧方隅漸泰不推天功專爲己力與奪任情臧否
肆意無君之跡日月以甚拔髮數罪蓋不足稱斬竹書愆豈
云能盡復託名朝宗陰圖毀逆睥睨天居窺覲聖寶乃有裂
冠毀冕之心將爲拔本塞源之事天旣厭亂人亦悔禍同惡
之中密來投告將而必誅罪無容捨又元天穆宗室末屬名
望素微遭逢際會頗參義舉不能竭其忠誠以奉家國乃復
棄本逐末背同卽異爲之謀主成彼禍心是而可忍孰不可
恕並已伏辜自貽伊感元惡旣除人神慶泰便可大赦天下
宋文帝誅徐羨之傅亮謝晦大赦詔一首

門下人生於三事之如一愛敬同極豈唯名教況乃施侔造物義在加隆者乎徐羨之傅亮謝晦階緣人乏荷恩在昔擢自無聞超居要重卵翼而長未足以譬永初之季天禍橫流大明傾曜四海過密實受顧託任同負圖不能過其股肱盡其心力送往無復言之效事居闕忠貞之節將順靡稱匡救蔑聞懷寵取容順成失得雖末因懼禍以建大策而逞其悖心不畏不義播遷之始屢肆鳩毒至止未幾顯行煞逆窮凶極虐荼毒倘加顛沛皂隸之手告盡逆旅之館都鄙哀愕行路飲涕故廬陵王英秀明遠徽風夙播魯衛之寄朝野屬情羨之等暴蔑求專忌賢畏逼造構無端成此貝錦蒙上罔下橫加流尋矯誣先旨致茲禍害寄以國命而竊爲仇讐旬月

之閒再肆醜毒痛感三靈怨結人鬼自書契以來棄惠安忍
反易天明未有如斯之甚昔子家從弑鄭人致討宋肥無辜
蕩澤爲戮況亂逆倍於往釁情痛深於國家此而可容孰不
可忍卽宜誅殛告謝存亡而于時大事甫爾異同紛擾且其
莫大之罪未彰匡國之跡實著是以遠酌人心近聽輿論雖
欲討亂慮或難圖故茹感含哀懷恥累載每念人生實難情
事未展何嘗不願影慟心伏枕泣血今逆臣之釁宣暴遐邇
君子悲憤義徒思奮家國讐恥可得而雪已命司寇肅明典
刑晦據上流或不卽罪朕親率六軍爲其邊防氛祲旣祛庶
幾政道思與億兆厲精思化其大赦天下

宋順帝誅崔惠景大赦詔一首

門下王室多難祲疹相仍昔歲紛阻鋒交九達今茲狂煽兵
連萬雉時事屯危罕有斯匹故令迷疑互起向背者多元惡
既懸猜懼彌廣奔亡草澤自反莫因近雖曲赦與之更始而
愚昧之徒猶多竄伏且邊寇未夷役連遐邇刑政弛張陷罪
非一思所以廣敷嘉惠被之億兆可大赦天下凡與崔慧景
協契同謀首爲奸逆爰及降叛輸力盡勤良由時道交喪源
流浸遠風槩靡立以至於斯悉皆濫滌一無所問凡諸反側
咸與惟新並皆宣慰還復萌伍國信之明皎如日月勝勸畿
要咸使聞知唯崔慧景諸子不在赦例

南齊東昏侯誅始安王遙光等大赦詔一首

門下朕肅纂乾統思弘祖業方欲剋廣洪猷寧濟遐邇實賴

羣才其康時務至於股肱宗戚情委特隆垂拱責成緝熙是
寄而各苞禍心規縱醜逆朕每存容隱冀或能悛而靡懲前
慝彌結後釁七百業艱宗廟事重不得不垂涕行戮以義斷
恩或藩屬皇宗或睦姻近戚夫豈不懷社稷故也雖四門已
穆羣凶靡餘而泣辜之歎義兼自昔方厲精思政登賢任官
隆平之化庶從茲始宜播嘉惠咸與惟新可大赦天下自今
月廿日昧爽以前謀反大逆手煞人以下皆赦除之頃歲戎
旅繁興叛征者眾其質繫家屬及同五代役三署見徒並詳
所原宥

後周武帝誅宇文護大赦詔一首

制詔太傅大司徒大宗伯大司馬大司寇大司空暨列將大

夫士州牧守土公侯伯子男等君親無將將而必誅太師大
冢宰晉國公護地實宗親義兼家國浚初草創同濟艱難遂
任總朝權寄深國命不能盡其忠貞罄以心力盡事居之節
申送往之誠朕兄故略陽公英風秀志神機穎悟地居正胤
禮歸當璧遺訓在耳忍害先加永尋摧割貫切骨髓明皇帝
聰明神武惟幾藏智護內懷凶悖外託尊崇凡厥臣僚誰忘
怨憤朕纂承洪業十有三載委政師輔責成宰司護志在無
君義違臣節懷茲蠶毒逞彼狼心任情誅暴肆行威福朋黨
相扇賄貨公行所好加羽毛所惡生創痍朕約已菲躬情存
庶政每恩施寬惠下輒抑而不行送使戶口凋殘征賦勞劇家
無日給人不聊生且三方未定邊隅尙阻疆場待戎旃之備

武夫資扞城之力侯伏侯龍恩萬壽劉勇等未効庸勳先居
上將高門峻宇甲第彫牆實繁有徒同惡相濟人不見德唯
利是視百姓嗷嗷道上以口含生業業相顧鉗口常恐七百
之基忽然顛墜億兆之命一旦阡危上累祖宗之靈下負蒼
黎之責便肅正典刑護已卽罪其餘凶黨咸亦伏誅氛霧旣
清遐邇同慶朝政惟新兆庶更始可大赦天下大辟罪以下
已發覺未發覺及繫囚長徒悉皆原免其流徙邊方未達前

缺下

文館詞林卷第六百六十九終

文館詞林卷第六百七十

詔四十 赦宥六

中書令太子賓客監修國史弘文館學士桂國高陽郡開國公臣許敬宗等奉救撰

漢武帝赦詔一首

漢元帝大赦詔一首

魏高貴鄉公大赦詔一首

西晉武帝赦詔一首

東晉成帝大赦詔一首

東晉康帝大赦詔一首

東晉孝武帝大赦詔一首

後魏文成帝恩降詔一首

後魏孝文帝大赦詔一首

宋文帝大赦詔一首

宋孝武帝大赦詔一首

原宥詔一首

南齊武帝原逋負詔一首

南齊明帝大赦詔一首

原逋負及罷省詔一首

梁武帝恩赦詔三首

開恩詔一首

降寬大詔一首

北齊文宣帝大赦詔二首

北齊武成帝大赦詔一首

北齊後主大赦詔一首

後周武帝大赦詔一首

赦齊人被掠爲奴婢詔一首

陳武帝宥沈泰家口詔一首

陳文帝免三道逆人家口詔一首

大赦詔二首

武德年中曲降十二軍界詔一首

漢武帝赦詔一首

制詔朕聞天地不變不成施化陰陽不變物不暢茂易曰通其變使人不倦詩云九變復貫知言之選朕嘉唐虞而樂殷

又食百才
周據舊以鑒新其赦天下與人更始諸逋貸及辭訟在孝景
三年以前皆勿聽理

漢元帝大赦詔一首

制詔蓋聞唐虞象刑而人不犯殷周行法而姦宄服今朕獲
承高祖之洪業託公侯之上夙夜戰慄永惟百姓之急未嘗
有忘焉然而陰陽未調三光曖昧元元大困流散道路盜賊
並興有司又長殘賊失牧人之術是皆朕之不明政有所虧
咎至于此朕甚自恥爲人父母若是之薄謂百姓何其大赦
天下賜人爵一級

魏高貴鄉公大赦詔一首

晉張華

制詔蓋至化寬以服人太上仁以懷物以寬故能含載無方

唯仁故能容養萬類苞體元元加勿踐之恩頓翹喘喘蒙弛
醫之德議獄緩死而眾生遂其性嘗災肆赦而萬邦荷其惠
此雷雨所以著象聖明所以播德也朕以沖昧獲統天位不
明於訓而託公王之上幸賴先相國晉王匡濟之勳自夏徂
荒違無不化相國晉王嗣業承緒繼明炤於四方仁風肇被
六合旁靡黎儀億兆日新厥志朕嘉使百姓厲精自肅以承
首化其大赦天下自謀反大逆以下已發覺未發繫囚見徒
坐過謫罰禁錮奪勞在今年月日昧爽已前皆悉赦除之亡
失官物及負官責逋久一切亡叛人赦書到後百日不自出
復罪如初敢以赦前事相告言皆以其罪罪之主者具爲詔
普告天下咸使聞知稱朕意焉

西晉武帝赦詔一首

張華

制詔居德厚以濟物清刑罰以服眚此皇義垂象所以使羣
生逸豫也御俗者必先以敬讓導德齊禮然後億兆知方有
恥且格三代令主唯茲爲務故刑厝不用大化咸和區區漢
文猶斷獄四百而當今德義不陳獄刑峻密吾旣不能寬以
居之莅事之吏又不能以仁恕求中競爭錐刀之末刻木爲
吏人猶懼之望四海夷泰與古昔同風此爲御行而求及前
人也每覽斷獄之奏居下訕上之訟未嘗不惻然悼心昔漢
相曹參以獄市爲寄欲使奸有所容彼豈愛奸人乎蓋哀其
皆可化之眚也今六合同軌夙夜兢兢思茂建皇極以濟其
源闡乎大理未知厥路何由且願令庶隸免一切之患徐與

羣賢其濟其弊其赦天下流宥遠方者皆原之殺人者人之
大害宜以殺止殺又諸以凶醜父母親戚所從及犯罪徙邊
者不從此令其申救有司所以將順厥政輔其不逮宰輔懷
曹參之仁司理守于張之正二千石長吏謹以文教惠綏百
姓庶使萬邦黎蒸各得其所稱朕意焉

東晉成帝大赦詔一首

制詔自中興以來或有艱難而君臣道隆是以雖夷險有時
而政道無虧去年以來三公頻喪爲國之基於此殄悴豈朕
之不德將時運之否哀傷惆悵不忘于懷且政刑之弊或有
煩濫宜見蕩滌其大赦天下

東晉康帝大赦詔一首

制詔先王統俗因時適會運有隆夷故應務殊軌至於流仁
惠以陶物崇易簡以臨下關古今而不遷者其道一矣朕以
寡德攝當大重不能協暢靈和緝熙庶績水旱失度頻歲不
登風教陵遲刑網滋彰雖否運將泰中原漸一梁岷釋甲南
夷稽服然河朔蕭條王澤未浹關右阻貳遺黎塗炭戎車野
次役務繁興征夫勤悴於外百姓勞弊於內每夙夜憂懼如
臨川谷思與羣后求人之瘼使元元之命咸得自新其大赦
天下

東晉孝武帝大赦詔一首

制詔夫百王雖殊尊本則一首物開統貫自孝敬因養帝而
後天人和道高而萬物順三代所以不言而被感極道神者

一而已矣朕賴社稷之靈嗣哲洪業帝維遠廓天衢開夷故
霜風晨拂則園陵肅清黎庶忘勞則七廟增峻方國覩惟新
之盛播紳觀裸薦之容宜酬情於九有暢大慶於普天且五
緯錯序風教靡聞導達之本仁功未遠政刑之平人未忘怨
豈惟物之多僻抑亦司典不明朕用鑿寐永歎慨然傷懷夫
三才同本通其契者得一祇誠理氣會其極者仁恕矜而有
之感遠自邇議獄緩死象和德而布澤灑蕩枯落拂宇宙而
咸新其大赦天下永嘉妖賊悉可原遺逋租宿責一皆除之
後魏文成帝恩降詔一首

門下朕以眇身纂承大業懼不能宣慈惠和寧濟萬寓夙夜
兢兢苦臨川谷然卽位以來百姓晏安風雨順序邊方無事

眾瑞兼呈不可稱數又於苑內獲方寸玉印其文曰子孫長
壽羣公卿士咸曰休哉豈朕一人克臻斯應實由天地祖宗
降祐之所致也思與兆庶共茲嘉慶其令大酺三日諸殊死
已下各降罪一等

後魏孝文帝大赦詔一首

門下飛宿澄天表懸象之光列嶽崇地著神區之寶故微辰
闡中乞圃敞朗嵩室鎮極赤縣彬分耀昊凝紫以保生真宰
緯黃而首唱蒼蒼兮靈功之在茲洪化之所由矣今元斬秀
洛壘歷鏡渾日月凝光寒暑交蔚冥化與陰陽齊和人風隨
天地俱合日止日時律唯黃鍾萌春潛陟乾正微顯禘天圓
頂虔祖地正百神受職千靈昭享皇依委而下顧萌繇繆以

仰祐幽明忽恍神人雜沓者哉朕德匪上皇道慙中淑謬鍾
定鼎運臻升中一昨奉記暫登太儀從步雲峰振玉風嶺望
閭闔而聳氣攀辰階以娛衿弗知何德可以爾乎思與兆獻
共斯嘉祐且天元之後萬務方新宜開太始章厥猷端可大
赦天下與人肇始諸謀反大逆外殺人殊死以下已發覺未
發覺繫囚禁錮自太和十九年十一月十九日長至昧爽已
前一皆原除逋負租調官物違限者自此年正月已前悉聽
與人有司詳准舊式備爲條格旣與萬邑具創風澤宜各濯
心日新厥政咸相申告稱朕意焉

宋文帝大赦詔一首

門下蓋聞遊拱巖廊可以爲政象刑而化天下弗犯朕雖虛

薄情在昧且樂與羣賢共弘政道而德不遠乎明不燭物致
朝野之才多遺庶官之用未盡陰陽屢亢旱澇成災奸臣藏
禍逆圖潛結加戎狄侵邊害流黎庶頻歲師旅行徭未息宵
言永念媿悼于懷今方隅已清眾役寧晏宜修其本以祛往
弊崇恩宥過惠此億兆可大赦天下并宣下內外明慎所司
戮力竭誠無或怠逸稱朕意焉

宋孝武帝大赦詔一首

門下歲慶聿新楸燦肅展耕實務本教以富立朕式應協風
躬藉三推仰供粢盛俯訓億兆庶罔庾克衍人和禮興填天
地並貺神祇罔愛肅慎楛矢浮溟來獻西極珍驥涉沙作寶
三茅曜寶五靈景祥維德弗明震乎瑞物思上答乾錫下敷

慶澤可大赦天下尚方長繫及逋租借責大明元年以前一
皆原除力田之人隨才敘用孝悌義順賜爵一級孤老貧疾
人穀十斛藉田職司優量黜賚今歲東作或乏糧種隨宜貸
給長吏親人宣勸異等者詳加褒進

宋孝武帝原宥詔一首

門下昔姬道方凝刑法斯措漢德初明犴圜用簡良由上一
其道下濳其性今人澆俗薄誠淺偽深重以寡德弗能正化
故知方者黜趣辟實繁向因巡覽見二尚方徒隸纓金履校
既有矜傷加國慶人和獨隔凱澤益以愍焉可詳所原宥
南齊武帝原逋負詔一首

門下自律變鍾絲氣移靈革清華謝德日月還輝朕垂冕中

朝肅承靈命求瘼待旻動慮分宵雖減賦平繇救之俗弊議
獄考官暢茲眇鬱而運革惇尤時殷澆暮四毗或阻九稔未
儲興言以念有疚懷抱凡厥率土自建元以來所負府庫金
穀悉原不督庶以知榮厚於游競均菽粟於水火

南齊明帝大赦詔一首

徐孝嗣

門下夫三辟興於標季十失在乎嚴刑張弛之宜此焉攸急
朕靖鑒中皇于茲五載方冊日陳前圖靡墜廉恥未期圖訟
猶廣邦之不臧寤寐矜歎今陽和用事品物咸新宜覃兆庶
與之更始可大赦天下逋租宿債在四年之前悉皆原除

南齊明帝原逋負及罷省詔一首

徐孝嗣

門下朕以寡薄嗣膺寶統對越靈命欽若前圖思所以敬守

成規拱揖羣后而哀荒在日有憫大猷慮軫納隍兢逾待旦
且宸居惟始八表觀風宜育德振人光昭睿軌凡連三調及
眾責負在今十一年七月卅日以前悉同蠲除其備償封籍
而貨賣未集亦皆還主御府諸署池田邸治興廢治事本施
一時於今無用詳所能省公宜權禁壹以還人關市征稅務
從優減主者量爲條格

梁武帝恩赦詔三首

沈約

門下朕受天明命光宅區宇仰調六漠旁詔百神日昃劬勞
於今三載矣雖靜言宣室留心聽斷而九服遐阻四聽靡達
恩未被毗化闕覃遠不能以仁義浸漉禮讓甄陶觸網入刑
誠非外至致茲闇淺抑有由然獄書日聞於幄坐弊罪相係

於圜室陷之在余良以多媿宜弘愷澤昭被率土可大赦天下

門下先天而天不違後天而奉天時然後可受金策於龍圖
應寶命於天位與二儀而同運一六合而光宅書不云乎皇
天無親惟德是輔人心無常惟惠是懷朕承百王之後當萬
乘之尊不能使青雲呈瑞白環表祥道被域中守在海外無
因布政空荷重負幽憂未除精華已竭豈宜再臨太階重辱
神器方欲縱心任杖歸老正壑迫以羣臣之請隨萬姓之心
懍乎夕惕坐以待旦思俾億兆咸與惟新可大赦天下其
逐食流移犯事逃亡並聽還復本業蠲課三年流徙清議禁
錮奪勞亦同寬釋在位羣臣宿衛文武邊疆戒口咸有劬勞普

賚一階孝悌力田爲父後者賜爵一級

門下朕昧旦劬勞慮切人命哀矜之情徒積漸被之功闕然從善知義未臻乎比屋弊罪斷刑猶勤於聽覽顧己修衷良以多媿興言重辟思加令免凡死罪已禽錄特令生命止付治署若罪應入死而逃叛未禽可開恩五十日並聽自首不問往罪是公家役限令各覓處自效遠近適意是其家口應坐質譴迹從原有

梁武帝開恩詔二首

徐勉

門下夫樂所自生含識之常性厚下安宅馭俗之通規朕矜此庶甿無忘待旦亟私生聚之略每布寬恤之恩而編戶未滋遷徙尚有輕去故鄉豈其本意資業殆闕自反莫由巢南

之心亦何能弭今開元發歲品物惟新思俾黔黎各安舊所
將使居無曠土邑靡游人雞犬相聞桑柘交暉凡天下之人
有流移他境在今天監十七年正月一日以前可開恩半歲
悉聽還本蠲課三年其流寓過遠者量加程日若有不樂還
者卽使著籍爲伍準舊課輸若流移之後本鄉無復居宅者
村司三老及餘親屬卽爲詣縣占請村內官宅令相容受使
戀本者還有所託凡坐爲市塚諸職割盜褻滅應被封籍者
其田宅車牛是其生生之具不得悉以沒入皆優量分留使
得自止其商賈富室亦不得憤相兼併遁叛之身罪無輕重
並許首出還復人伍若有拘限自還本役可明爲條格咸使
聞知

梁武帝降寬大詔一首

門下朕矜此下人鑿寐興想赦過之令氣序相尋而罕識愚人尚多犯法思同雷雨降茲寬大凡劫賊未擒及結正餘口未擒者悉聽詣所在自首還復人伍或犯死罪而家人非從坐者亦聽遣質依前許首若罪應入重而不預權制可特原死依權制補謫經亡叛隱匿賀襲巧注皆許首正女丁質繫權悉散遣其割盜亡失守責違負家丁質駐同聽權散許自輸送凡前諸科咸開恩百日今九年以前三調遺餘非列畢限州郡精加檢括審在人閒未入官者並聽停督主者詳爲條格施行

北齊文宣帝大赦詔二首

魏收

門下朕實應大命悚答上靈入坐青蒲出居黃屋永懷政術
無忘化本文武兼運賞罰俱行用恢九道是寧萬國玄穹孔
鑒諸神效祉寶圖已協玉燭無違所以晉缺王詩魏執帝藉
璽稱侍國久亡裔土自我會昌隨運而至鳥迹口蟠飛光漾
彩豈伊人事理契冥符屬此非常朝野動色幽明篤貺欣贊
有典解網弘施抑惟舊章顧修寡德推而弗處實用祇懍匪
違休息夜思待旦安不忘勤沙漠遺虜爲梗歷葉江淮宿夷
隔代未款或六師親指或三軍薄伐玄海息其橫波赤野卷
其毒霧胡馬追風汗赭而遠入越象垂鼻蹈節以呈馴遐邇
率從中外一體天眷廟靈同獎興運往者印山潁川諸有勝
捷秦中將士久見俘囚比加寬貸有所料免義在申恩非要

力用而感德奮身效力攻討圖勞命賞並出優洽自餘拘禁未從霈然雖來非慕義而事由驅逼原心略迹在可哀矜既湜成羣品含養庶類本存覆燾何論彼此苟曰非所是用傷側又率土之廣黔黎之眾形肖天地氣稟陰陽宰害吏侵致虧亭毒有一於此良所寤歎今三方大定關隴未夷謀夫展策以抑揚猛士效勇而慷慨方介馬出車蕩刷醜鼓行而超涇渭指盡而掩瓜涼思流惠區中加仁域外明雷雨之義開造育之始可大赦天下自天保七年七月廿六日昧爽以前赤手殺人繫囚見徒悉皆原免

門下兩儀言大以生爲德四時之信仁實爲首朕撫茲興運尊居域中協契神祇冥心造育以至道弘濟義不獨善慈惠

所在形有俱遂是故齊居深念志先含養根芟蠹蠕思無天
闕一物非所常以惻然欲令品庶咸得其性雖區寓穆清朝
野寧緝風雨調節日月光華雖休勿休無忘夕惕尚恐下情
未達上聽不廣吏乖其道人致怨侵疾苦或存恩意猶隔俾
我中懷未宣率土子育黔首能不伊慨赭衣艾鞶齊德導禮
通之有術夫復何難又以江東旅拒年代淹積慕義畏威交
臂藩款疇曰匪毗咸爲臣妾秦隴逋誅久穢關輔天篤其禍
魁數先亡更相翦害胤嗣孤弱眾叛親離莫不解體方六師
雷動伐罪弔叱廓周漢之舊墟奄蔥沙而爲一將使億兆同
欣王略無外思所以捨過宥罪持綱解目蕩滌牢狴叶暢時
和凡百食毛賜其更始可大赦天下自天保九年四月十九

日昧爽已前赤手殺人繫囚見徒悉皆原免孝子順孫義夫
節婦道著工園者標其門閭俠藏軍器亡命山澤百日不伏
首者復罪如初以赦前事相告言者以其罪罪之赦書日行
七百里

北齊武成帝大赦詔一首

魏收

門下齊應天歷會昌神道代及握紀照臨萬方朕以寡德對
揚靈命將茲大業作君四海永言丕緒夙夜惟夤昔高邑成
禮繁昌正位受圖縮璽仍晉之陽冬序告終六龍啟路元春
獻吉欽著前典紺幄紫壇配聖尊極清廟大官升食合祖協
時展事咸序幽明陟降薦享實深感暢加以百辟庶察執斯
故實奉深主鬯屢聞聽覽釐此陰教固本少陽百王彝範事

非撝挹俯從羣請俱正其位顧以虛薄允答天休王度國章
人神以愜猥居人上子育率土思慕堯舜平此太階今方隅
肅然中外一體股肱爪牙心如鐵石謀猷折衝穆我風化陽
煦云始庶品方作順天播澤今也其時蕩刷瑕穢混清區宇
與物更始無思不洽可大赦天下自大寧二年正月十八日
昧爽已前謀反大逆已發覺未發覺赤手殺人繫囚見徒及
長徒之身悉從原免流從邊方未至前所者並亦聽還清議
禁錮及七品已上犯奸盜之徒亦在原限九州職人並進二
級內外文武百官並進一級亡官失爵復其資品凡諸賦稅
懸在人閒及逋租懸調負貸官財主掌自盜亦皆勿徵諸爲
父後者賜爵一級

北齊後主大赦詔一首

魏收

門下昊天不弔降茲大禍大行太上皇帝委棄率土昇遐奄
及攀號永慕上下崩殞仰惟誕聖應期樂推在運尊居宸極
大濟區寰垂日月之明灑雲雨之澤百神奉職千齡云在三
才允穆萬代一時雷霆所致罔不奔走舟車混會九域歸仰
禮以正朝樂以移俗有感咸遠日用不知天平地成何思何
慮神遊物外爲而弗有言訪嶮峒且眷姑射悠然獨遠糠粃
堯舜牢籠遂古無得而稱朕以虛寡夙承寶歷膝下過庭罔
極空軫精誠罕鑒荼蓼遂臻永惟窮毒泣血靡告惟我爪牙
心腹不二之臣體國銜哀義百恆品億兆蒼生宿賴矜貸若
喪考妣事切唐人仰惟先旨深慈廣洽宜宣弘施被以餘恩

惠及囹圄且滌瑕穢可大赦天下自天統四年十二月十五日昧爽已前謀反大逆已發覺未發覺赤手殺人繫囚見徒長徒之身一切原免流徙邊方未至前所悉亦聽還九州職人普加四級內外百官並加兩級亡官失爵悉復資品天統三年以前凡諸賦稅懸在人閒及逋租懸調一以原免其常赦所不免者不在赦例

後周武帝大赦詔一首

制詔人生而靜純懿之性本均感物而遷嗜欲之情斯起雖復雲鳥殊代文質異時莫不限以隄防示之禁令朕君臨萬寓覆養黎元思振頽綱納之軌式比囚人有犯與眾棄之所
在羣官有愆過者咸聽首露莫不輕重畢陳纖豪無隱斯則

風行草偃從化無違導德齊禮庶幾可致但上失其道有自
來矣陵夷之弊反本無由宜加蕩滌與人更始可大赦天下
後周武帝赦齊人被掠爲奴婢詔一首

制詔無侮斃獨事顯前書哀彼矜人惠流往訓偽齊末政昏
虐實繁災甚稽天毒流比屋無罪無辜係虜三軍之手不飲
不食僵仆九達之閒朕爲人父母職養黎庶念甚泣辜誠深
罪已除其苛政事屬改張宜加寬宥兼行振卹自偽武平三
年以來河南諸州之人僞齊破掠爲奴婢者不問官私並宜
放免其住在淮南者亦卽聽還願住淮北者可隨便安置其
有癯殘孤老飢餓絕食不能自在者仰刺史守令及親人長
司躬自檢校無親屬者所在給其衣食務使存濟

陳武帝宥沈泰家口詔一首

徐陵

門下罰不及嗣自古通典罪疑惟輕布在方策沈泰反覆無
行遐邇所知昔有微功仍荷朝寄割符名郡推轂累藩漢口
班師還居方岳良田逾於四百食客非止三千富貴榮華政
當如此鬼害其盈天奪之魄無故猖狂自投獯醜雖復知人
則哲惟帝其難光武有敝於龐萌魏武不知於于禁但今朝
廷無我負人其部曲妻兒各令復業在所及軍人若有恐脅
侵掠者皆以劫論若有男女口爲人所藏並許詣臺申訴

隨文帝免三道逆人家口詔一首

李德林

門下往者周歷將窮禍生寓內四海之望有若瞻烏尉迥跋
扈鄴城吞六國之半司馬消難趙超安陸合三吳之從王謙

割據岷峨稱兵內興並鴟張豕食蝟起狼獾士庶相憂溝壑
非遠朕昔當朝宰任專征伐每簡將帥遞出兵車憑上天之
靈藉羣才之力干戈所及雲除席卷諸將懷熊羆之心執法
守鷹鷂之志奮疾雷之怒行嚴霜之誅逆亂家口咸充賞物
論此三凶前朝貴仕各總藩鎮俱有威權搖盪三方擁逼兆
庶元謀同惡其數無幾自餘則在其罔羅皆被迫脅形同醜
類事非本心親戚因之長爲賤隸同國境之內共聲教之下
或良善親通或衣冠血屬邑屋桑梓舉目弗遙男曰入奴女
爲人婢其爲憂歎何止向隅同感性靈咸相愍念况朕受天
明命爲其父母有一於此情深納隍誠欲盪滌疵瑕悉以原
宥但分配之日折物賞勳虛而奪之功臣或怨其從尉迴司

馬消難王謙作逆非元謀之家良口配動人見爲奴婢若有
家人親舊依本折物之直贖者聽之若無家人親舊有口之
人宜具錄文簿卽上尚書官爲酬贖庶使有功獲賞不失王
者之信有罪見卹微示哀矜之情

隨文帝大赦詔二首

薛道衡

門下朕肇開寶運君臨區宇承干戈之後當澆弊之俗思欲
代刑以德改薄歸濳使人識廉恥家興禮讓雖遷善之毗十
室變九而不移之性莫能盡革憲網由其未輟囹圄所以尚
存每臨朝聽政法司奏獄惻愴不怡終夕忘寐願惟薄德感
物未弘責實存予興言慙惕今冬律已窮陽和方始宜申惠
澤咸使更新自開皇七年十二月一日已前犯罪之徒宜依

前件

門下春生夏養天地之大德解網泣辜聖人之明訓朕恭膺寶命撫臨四海承喪亂之後當凋弊之辰憂勞庶務不遑寢食夜思政道坐以待旦欲使人皆從化家悉遷善禮讓興行刑罰勿用而德慙感物道有未弘致使囹圄尚存憲綱不息每法司敷奏言及刑名念彼凜風良深媿歎時惟開歲陽和載始宜順天布澤與物更新可大赦天下自開皇十九年正月七日昧爽已前大辟罪已下已發露未發露繫囚見徒悉從原放

武德年中曲降十二軍界詔一首

門下朕膺籙受圖君臨區宇承凋弊之餘俗拯黎元於塗炭

夕惕思父日旰忘勞每念粟帛不豐人多匱乏干戈未戢獄
犴猶繁納隍之慮無忘寢食然而神皋輿區京畿攸在四方
輻湊之所萬國朝宗之地頃年薄伐師旅薦興行役轉輸不
遑寧息加以往因喪亂條章廢

下闕